

Dana galak warga derma pada seni

Setiap derma dipadankan dengan jumlah sama dari pemerintah melalui Dana Pemadanan Budaya bernilai \$200j

PEMERINTAH semalam melancarkan Dana Pemadanan Budaya (CMF) bernilai \$200 juta yang bertujuan menggalakkan semangat menderma kepada sektor seni dan budaya di sini.

Dengan dana itu, setiap derma yang disumbangkan oleh orang ramai kepada semua badan amal seni dan warisan serta institusi bertaraf awam (IPC), akan dipadankan dengan sumbangan yang sama oleh pemerintah – tanpa mengira besar kecilnya derma tersebut.

Pemadanan sumbangan derma itu berkuat kuasa semalam.

Sebagai ganjaran, penderma boleh menikmati potongan cukai 250 peratus bagi derma yang mereka huluskan.

Mereka juga boleh dipilih sebagai penaung seni atau warisan oleh Majlis Seni Kebangsaan (NAC) atau Lembaga Warisan Negara (NHB).

Mengumumkan demikian di pelancaran Festival Penulis Singapura (SWF) 2013 di Universiti Pengurusan Singapura (SMU) semalam, pemangku Menteri Kebudayaan, Masyarakat dan Belia, Encik Lawrence Wong, berkata dana itu boleh dimanfaatkan lebih 100 pertubuhan budaya – termasuk kumpulan seni, muzium seni visual dan warisan, pengendali lokasi seni dan institusi pendidikan seni.

“Budaya dan warisan kita meru-

pakan bahagian penting yang menjadikan Singapura sebuah kediaman untuk kita semua. Saya harap CMF ini melahirkan rasa pemilikan bersama di kalangan kita menyumbang kepada landskap seni dan warisan kita.

“Apabila lebih ramai di kalangan kita tampil terlibat dalam pembangunan budaya kita, saya percaya ia akan mencetuskan lebih banyak hasil kreatif yang dapat dikenal pasti warga Singapura dan boleh mereka banggakan,” kata Encik Wong.

Menurut Kementerian Kebudayaan, Masyarakat dan Belia (MC-CY), kegunaan CMF akan dibahagikan kepada membiayai perbelanjaan harian dan pengekalan jangka panjang.

Bagi geran pemadanan \$300,000 pertama yang diterima setiap tahun, ia boleh digunakan dengan fleksibel – selagi ia bukan untuk aktiviti yang berbahaya bagi

Singapura, seperti mencetuskan konflik atau salah faham di antara kaum atau agama.

Selepas \$300,000, geran pemadanan boleh digunakan untuk pembangunan jangka panjang.

Ini termasuk mempertingkatkan keupayaan pertubuhan, membeli hasil seni atau artifak yang dapat dimanfaatkan orang awam, dan membangunkan atau mempertingkatkan prasarana budaya.

Dalam ucapannya di majlis pelancaran itu, Encik Wong memberi jaminan pemerintah akan terus menyokong arena persuratan tempatan, termasuk ekosistem sastera dan buku Singapura, dan memupuk generasi penulis baru.

SWF tahun ini juga akan menjadi hos kepada Persidangan Persuratan Melayu yang pertama yang bakal menampilkan penulis seperti Isa Kamari dan penerima Pingat Budaya 2013, Mohamed Latiff Mohamed.



“Budaya dan warisan kita merupakan bahagian penting yang menjadikan Singapura sebuah kediaman untuk kita semua. Saya harap CMF ini melahirkan rasa pemilikan bersama di kalangan kita menyumbang kepada landskap seni dan warisan kita. Apabila lebih ramai di

kalangan kita tampil terlibat dalam pembangunan budaya kita, saya percaya ia akan mencetuskan lebih banyak hasil kreatif yang dapat dikenal pasti warga Singapura dan boleh mereka banggakan.”

– Encik Lawrence Wong,
Pemangku Menteri Kebudayaan, Masyarakat dan Belia.